

明、譚希思撰

清、光緒思賢書局刊本

明大政纂要
(六)

文海出版社有限公司印行

元明史料叢編 第三輯

明大政纂要(六)

明·譚希思撰

六十三卷 (清·光緒思賢書局刊本)

文海出版社有限公司 印行

明大政纂要卷之三十二

明都察院右副都御史四川巡撫茶陵譚希思編輯
成化十四年戊戌春正月甲子朔

舉計典

凡二千十六員惟福建布政鍾清浙江按察使劉鈺江西按察使趙啟清愼正直中外所聞爲權奸忌陷俱列不謹君子惜之鈺忠愍公球之仲子也學行爲尤著云

甲戌大祀天地於南郊

復差御史於陝西洮河諸處巡查

陞彭韶爲廣東左布政使

令軍職冒襲連保勘官揭黃罷職

令文職功陞俸級雖陞調照舊關支

二月皇太子出閣講學

以王獻黎瀉謝一夔汪諧鄭環羅璟更番侍班彭華江朝宗
劉健程敏政周經陸鉉張昇張順更番講讀時東宮內官典
璽局郎覃吉溫雅誠篤議論方正暇則開說五府六部及天
下民情農桑軍務以至宦者專權蠹國情弊悉宜言之上賞
賜東宮五莊吉備言天下山河皆主所有徒勞民傷財爲左
右之利而已竟辭之

禁問刑衙門引用革去條例

命禮部尙書兼翰學劉吉翰院學士彭華爲會試考官

取梁儲等三百五十人

令軍政官五年一考選

增設雲南整飭臨安兵備

修國子監

三月皇太子冠

命每月朔望百官奉天殿朝參後赴文華殿行禮

進萬安吏部尚書謹身殿大學士劉珝劉吉太子少保文淵閣大學士

除吏員人等納銀事例

先是寧夏巡撫賈俊奏行已得旨臺臣連名乞罷上曰漢文帝從晁錯備邊之策令民納粟拜爵後人惜其作俑邇者有司以乏邊儲又議行納銀事例後世又將謂何御史言是宜一切罷勿行

廷試賜曾彥楊守陟曾追等進士及第出身有差

踰月改梁儲楊廷和等二十八人爲庶吉士是科劉俊劉忠

彥皆有聞

復開遼東廣寧等處馬市

致仕南京翰林院修撰羅倫卒諡文毅

倫字應魁對策大廷以所學進言正直不阿人至今傳之奏名第一授修撰甫三月上扶植綱常疏忤李賢調提舉明年賢卒復今職逾年解官歸學者多從之性直戇不恤世情與人言竭盡底衷不察言觀色不好名不營利遇事無所回避其高風凌節真無人間煙火氣楊文貞相時以百官祿薄得受阜隸折薪錢遂爲例獨羅不受旣辭疾歸給茅舍於金斗山取給於隴畝不受餽遺日與學者講學垂十年而終年四十八正德中追諡文毅但以剛強疾惡爲縉紳所忌故憲廟實錄多貶詞豈亦不顧萬世之公議歟

上杭盜起巡撫僉都御史高明討平之

先後禽獲賊首曾宗鄧嵩等三百一十三人內三十六人梟示餘多瘐死存一百二人明奏係脅從詔貸其死杖發廣西邊衛軍是年十二月明辭疾歸

以王恕爲南兵部尚書仍參贊機務

免浙江收買花木

時水旱饑饉從巡按張銳奏也

安南國王黎灝奏辯占占城事

時陪臣阮達濟齎疏其略曰占城原與臣通好自成化十一年得琉球國海船漂風之眾遂率以侵掠爲臣國邊兵所敗今奉敕責諭臣復其土宇誠恐天使急遽緝訪難詳而占城與臣國爲讐言不足信乞遣朝使申畫郊圻興滅繼絕使占

城上下輯寧臣國邊陲休息此臣之大願也上下其章於所司

命兵部侍郎馬文升招安建州三衛夷人

時陳鉞計生功而汪直又營出邊廟議以文升往卒之鉞欲搗巢文升欲招安王英之計出而汪直巡邊

夏四月設貴州程蕃府儒學

十七年十一月知府鄧廷瓚請開貢上以科舉之業未可猝成姑令歲貢一人觀光上國相勸於學以稱立賢無方之意五月免徵遼東都司歲貢藥材二年

遼東歲貢人參三百斤五味子一百五十斤連年貢朱至巡撫陳鉞奏藥材產於鳳凰山黟陽等處距遼四百餘里密邇虜巢時被侵掠不得採取乞暫停免故有是旨

陞黎淳爲吏部右侍郎張瓚爲戶部左侍郎

御製詩集成

凡四卷五百八十九首

兵部尙書余子俊議上武舉科條

時汪直用事欲以建白爲名吳綬爲撰草奏請武舉設科鄉會殿試悉如進士恩例下兵部集議於是子俊會文武大臣暨科道官議上武舉科條大略鄉試以九月會試以三月初場試射二場試論判語三場試策殿試以四月一日賜武舉及第出身有差恩榮次第錄名勒碑亦如進士科制內閣竊計汪直所奏出吳綬所撰祖宗設科取士文武自是不同然阻之必有禍及奏上票旨武舉重事未易卽行令兵部移文天下教養數年俟有成效巡按提學等官具奏處置

六月設肇慶府恩平縣

令汪直往遼東處置邊務

初百戶王英謀欲往遼撫夷會遣馬文升不得遂至是聞文升撫定功垂成復囑直往而佐之行其意以建州雖安朵顏三衛宜撫欲因以爲功且沮通事詹升之進後英竟陞千戶而文升之禍肇矣

秋七月浙江按察使楊瑄卒

瑄豐城人爲御史耿節敢言劾奏石亨曹吉祥英皇怒召至文華殿與其寮周斌同指斥二兇罪狀乃坐死會大風電走正陽門下馬牌於郊外得末減戍鐵嶺尋宥瑄不詣二兇謝復搆戍南州上踐祚起瑄尋改按察使振憲度奉職益勤年五十四卒於官人惜其未究云

副都御史朱鑑卒

鑑晉江人由舉人教諭擢御史巡湖廣廣東皆有聲陞參政布政以虞警陞副都御史巡撫山西經制得宜召還佐院事再乞休致家居二十七年鑑公廉明敏片言是非立斷所至吏畏民懷嘗上書言數十款皆大計詔褒之其政事之才歟賜祭葬錄孫爲國子生

執詐僞人楊福

福江西人嘗爲崇府內使僕役隨入京旣而逃還過南京遇所識者謂其貌似汪直乃詐稱爲直而所識者僞爲校尉先導自蕪湖乘傳給廩厯常蘇由杭州抵寧紹大小官皆信畏承奉軍民詞訟亦爲受理至台溫處州繞建寧延平皆操兵盤糧以張威福所過假廉以取信而僞校則任其納賄及抵

福州稱有敕旨三司而下迎候唯謹小官忤意者輒杖之竟爲鎮守太監盧勝等察知執問如律蓋直勢灼震天下小人乘之擾害如此云

申明馬政新舊例

定土官犯贓罪及蔭襲者先行查勘冊報

禁西山鑿石

八月執巡撫江南副都御史牟倬戍邊調侍講學士江朝宗於外任

初汪直欲往遼東伺察未果巡撫陳鉞聞之懼遣人賄直所厚者爲之解既又令人自廣寧抵山海關一帶諷其居人候直過羣伏道左保鉞行事公當直左右納鉞賄者因加稱贊直信之不疑至廣寧鉞便服雜僕從中奉命唯謹直大喜鉞

因譖馬文升及俸以俸撫山東時有隙也至是俸議事至京直還朝鉞囑直發之事連浙江僉事吳珮等多人差官校逮至吳綬承直風旨備極拷掠訊之皆不實俸獨誣伏受常熟等處糧長銀三千五百兩以受財枉法律謫鎮遠衛戍朝宗以常有事囑俸調廣東提舉珮等皆無罪放之俸至戍所逾年卒俸之獄人皆知其爲直所陷以知府許聰之死俸實有助故無有恤其寃者

廣西太平府四川威州皆地震

太平自六月至是凡七震威州二十三日又震

禁將同姓民抵充軍役

令文官犯貪污者追奪原受誥敕

及官吏監生問軍爲民等項招由開報吏部查考

陳鉞子澍乞入國學自效許之

澍以奏捷陞錦衣衛冠帶小旗鉞奏澍嘗爲生員不能操練且援李秉子華項忠子綬俱以奏捷陞所鎮撫之例下兵部余子俊請免澍旗役令冠帶入監

戊戌早朝東班亂

班中若聞有甲兵聲因辟易不復成列衛士爭露刃以備不虞久之乃定上命御史究所從起竟莫能得

命整點兩京禁兵

禁科斂

附錄巡按直隸御史范銖奏江北大水爲災漂沒田廬倒塌城郭春秋傳曰大水者陰逆與怨氣並所致也伏望親賢遠奸信賞必罰仍敕翰林院博稽往事敷陳致災之由欽天監占

候天象推詳災咎之應科道直言無隱吏部用人無私法司鞫囚無枉戶工二部一切逋欠之物不急之務宜停征罷役及將被災之處今年夏秋稅糧爲除豁以蘇民困疏入上曰所言皆已行之事所司其知之

九月陞嘉興知府楊繼宗爲浙江按察使

陞御史戴珊爲陝西提學副使

封皇子祐楡爲岐王

祐楨益王祐揮衡王祐檉雍王祐楮壽王祐棖汝王祐檉涇王祐樞榮王祐楷申王案岐王邵后生弘治八年之國德安無子國除益王張妃生弘治八年之國建昌今世封衡王張妃生弘治十二年之國青州今世封雍王邵后生弘治十二年之國衡州無子國除壽王姚妃生弘治十一年之國保

府十七年徙德州無子國除汝王張妃生弘治十四年之國
衛輝無子國除涇王楊妃生弘治十五年之國沂州無子國
除榮王潘妃生正德三年之國常德今世封申王楊妃生封
敘州未之國無子國除

遣御史三員於良鄉固安通州三路巡南捕盜

定隱匿賊情罪例

一二次不報者停俸三次者戴罪俱捕盜如故四次以上監
奏降等用

冬十月加萬安王越太子太保余子俊林聰張文質太子少保
命御史婁謙提督南畿學校

遣降韓府藻陰王徵錕爲庶人

王母平氏妃周氏冒封郡王縣主者皆賜死先是王有疾周

恂入問竊語王曰王有病無後何不取家人子以奉王後王以爲然令二宮人假稱有娠諸王來問疾俱以託之及王薨恂與王母及妃謀取其妻之女及他人男前後令妾與子抱納宮中旣長俱受封旣而恂之姻家以私忿發其事下院司廉得實刑部具獄以聞上曰周恂陰謀主使紊亂宗枝陵遲處死妻妾子俱斬冒封男女及平氏周氏俱賜自盡仍錄獄詞寫書各王府知之

逮吉安知府黃景隆至京下獄死

先是巡按沃頰奏其淹禁陵虐故勘致死人犯計三百八十七人都察院覆奏命刑部郎中屠勳錦衣衛百戶楊綱會撫按三司鞫治閱籍致死者四百七十人無罪而故勘故禁死者百有六人有一家五人者有父子兄弟三四人者坐淩遲